

# Philemon

*Paul Bimarnebimbom Nahni Djurra Philemon  
Nuye  
Philemon 1:1-3*

<sup>1</sup> Ngaye wanhj Paul nganedjarrkdi Timothy nawu karridanginj. Bu ngaye ngamarnedurrk-mirri Christ Jesus, wanhj kunmekbekenh kunu ngandikurmeng kore prison. Ngad wanhj nganebimbun ngudberre nahni djurra, ngudda Philemon, nawu ngundimarnedjareminj, nawu ngad karridjarrkdurrkmirri. <sup>2</sup> Dja mak nawu ngudda Apphia ngalbu karridanginj, dja mak ngudda Archippus nawu karribidyikarrmerren bu karridjarrkdurrkmirri, dja mak nawu ngurrimirndemornnamerren yiwarrudj kore ngudda ke kunrurrk, nawu ngudda Philemon. <sup>3</sup> Ngadjare God nawu Kornkumo kadberre dja mak Jesus Christ nawu Kawohrnан Rowk bu ngundiwon ngudberre kunmakmak kore kunmodmikenh dorrengħ.

*Paul Bimanjbom God Nawu Philemonkenh  
Philemon 1:4-7*

<sup>4</sup> Ngaye burrbuhburrbun ngudda bu ngahdi yiwarrudj ke, wanhj ngaye ngadjalmanjbun ngardduk God bu nguddakenh munguyh. <sup>5</sup> Bu kuhni ngaye wobekkang bu ngudda yiwer-hwoybukwon Jesus nawu Kawohrnан Rowk,

dja mak yibenmarnedjare rowk nawu birrimak bininj nuye God. <sup>6</sup> Bu ngahdi yiwarrudj ke, wanjh ngaye ngadjawan God ngunmarnbun bu ngudda yibenmarneweykan birribuyika bininj bu yimulewarren kore ngudda ke kunwoybuk, ba bu ngudda yiwerhburrbun kunmakmak rowk manbu karrikurduyime kore Christ kanwongkenh bu karribelbmerrinj. <sup>7</sup> Yina, nawu ngarrdanginj, ngudda wanjh yibenmarnedjareminj nawu God nuye bininj, dja mak ngudda yibenkangemarnbom bulkkidj duninjh. Kuhni wanjh ngaye warridj kankange-murrngrayekwong dja mak kannjilngmarnbom bulkkidj duninjh.

*Paul Biyolyolmeng Bininj Kangeyyo Onesimus  
Philemon 1:8-22*

<sup>8-12</sup> Mah wanjh. Djawan ngudda bu nawu Onesimuskenh\*. Bu kerrngehkenhni nungka wanjh bongdi rerrih dja mak ngunmarnedurkimirri ke. Kaluk minj njale kunmak kurduyimeninj ke bu nungka ngundjalbawong kelerlobmeng. Ngaye wanjh ngarrurndiwe bolkkime bu karrurndeng kore ngudda ngunedjarrkdi. Dja wanjh bolkkime nungka makminj ngarrku, kore ngudda dja ngaye. Ngaye djawan bu yikurduyime kunmak nuye bu yikimang.

Ngudda nawu ngarrdjarrkbelbmerrinj kore Christ dorreng, dja kuninjkunukenh ngaye nuk minj djurrkkan, dja bonj. Ngaye yelehyeledj

---

\* **1:8-12** Nawu kunngey Onesimus kamenyime “karrurkimirri kore kunwernkenh”.

djawadjawan ngudda. Bu ngad ngarrmarned-jaremerren, wanjh kunmekbekenh bu djawahd-jawan ngudda bu yikurduyime ngardduk. Yina, yiburrbun ngaye, nawu Paul, wanjh ngokko ngakohbanjminj, dja mak yiman ngabongdi nuye Christ Jesus. Ngaye mak yidjawan ngudda Onesimus nawu yiman kayime ngardduk beywurd rerrih. Kaluk ngaye bolkkime ngayimerranj kornkumo nuye nawu ngaye ngarrukkendi wirl-murrng nawu narayek dorrengk kondah kore prison.

Dja nganjilngwarre bu ngamunkewe nahni bininj! <sup>13</sup> Ngaye ngadjare nungka nganedi ba bu nganbidyikarrme kondah kore prison ngahni bu kunmekbekenh ngaye ngayolyolmi bedberre bininj kunwok manmak. Bu nungka nganbidyikarrmeng bu ngudda minj yimrawinj. <sup>14</sup> Dja burrkyak, dja ngaye minj ngadjareniwirrinj bu djurkkayi bu ngudda kanwoyinj nungka. Kunubewu minj yidjareniwirrinj bu kanwoyi, dja minj ngadjareniwirrinj bu djurkkayi ngudda. Wanjh ngamunkewe ba bu yikimang ngunedjaldi munguyh.

<sup>15</sup> Kunubewu Onesimus wanjh ngunbwawong wam waken yerkang, bu yerrekah wanjh nungka kamyawoyhdurndeng wanjh ngunedjar-kdi munguyh munguyh. <sup>16</sup> Dja wanjh bolkkime minj yiawoyhmarnbun bu kabongdi ke, dja kayimerran nawu ngudda ngunedanginj nawu ngunemarnedjaremerren duninh. Ngaye war-ridj ngamarnedjare duninh dja ngudda wanjh yiwerhmarndjarenin bulkkidj duninh. Kaluk ngudda yimarnedjare nahni bininj yiman kay-

ime ngunedangerrinj rerrih kore nawu Kawohrnan Rowk.

<sup>17</sup> Mah wanjh, bu ngudda kanburrbun ngaye ngarrdabbolk, wanjh yikima nawu Onesimus yiman bu ngaye kankimang. <sup>18</sup> Dja bu nungka wardi kurduyimeninj ke yehyeng kore kunwarrehwarre, wanjh kunukka kanwelengnamen ngardduk. Dja mak bu bulk kakarrme nawu yehyeng ke wanjh kunukka kandjawa ngardduk ba bu marnekaremmarnbun. <sup>19</sup> Dja yina. Ngaye, nawu Paul, kuhni wanjh ngayeman kunbid ngardduk bu ngahbimbun nahni djurra. Kaluk ngaye ngakarremulewan nawu Onesimus bulk kahkarrme nawu yehyeng. Dja mak ngaye minj djawayinj bu kanwon nawu bulk yikarrme ngardduk, ngayime bu ngaye bidyikarrmeng bu yiwoybukwong Jesus dja wanjh bolkkime yimalngdarrkiddi. <sup>20</sup> Nawu ngudda ngaye ngardanginj, ngaye kuhni djawan ba bu yikurduyime ngardduk kore Kawohrnan Rowk kadberre. Djawan bu kankangemarnbom bu Christkenh. <sup>21</sup> Ngaye ngahbimbun nahni djurra, bu kuninkunukenh ngaburrbun yikurduyime kore ngaye djawahdjawani dja mak kunbuyika kunwern ngudda kore kanmarnekurduyime.

<sup>22</sup> Mak mahni mankudji manbuyika manbu ngurriyingkihbolkmarnbu ngardduk ba bu ngaye ngamre ngayo kore ngudda. Ngaye ngayime woybukkih God wanjh ngunbekkan ngudda bu yirri yiwarrudj. Wanjh kunu ngaye ngamdurndeng ngudberre.

*Paul Dja Birribuyika Bininj Kabirriwok-munkewerren Kunwok Manmakkenh  
Philemon 1:23-25*

<sup>23</sup> Nawu Epaphras nungka wanjh nganedjarrkdukkayindi Christ Jesuskenh, wanjh nungka kunwok kunmak ngunmarnewokmunkewe ngudberre. <sup>24</sup> Dja mak nawu Mark, dja mak Aristarchus, kaluk Demas, dja Luke dorreng, wanjh birriwokmunkewerrinj kunmak ngudberre. Bedda wanjh ngarridjarrkdurrkmirri. <sup>25</sup> Bonj. Ngaye ngadjare Jesus Christ nawu Kawohrnан Rowk ngundjalmarnekurdyime kunmak rowk kore ngudberre kukange.

**God Nuye Kunmok**  
**The Holy Bible in the Kunwijk language of Australia**  
copyright © 2018 Bible Society of Australia

Language: Kunwijk (Gunwinggu)

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.  
Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2019-04-22

---

PDF generated using Haiola and XeLaTeX on 11 Nov 2022 from source files dated 19 Jul 2021

1e76c3c7-fc1a-5488-bdac-9a98d749a074